

Kontuola

ANTZUOLA / Egubakoitza / 2003ko irailaren 5a / 168. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Buztinzuri hiru bat hilabetez egongo da itxita, inguru hartako urbanizazio lanak direla eta

AINZANE IRIZAR


Abuztuaren 25ean itxi zuten Buztinzuri kalea, urbanizazio lanekin hasteko. Udaleko arduradunen esanetan, gutxienez hiru hilabetez egongo da zirkulazioari moztuta. Besteak beste, lurzoru berria jarri eta Ondarrerako zubia egingo dute hilabete hauetan.

Eskola parean hasi eta Talleres Antzuola pareraino dago itxita Buztinzuri kalea. Udaleko arduradunek esan digutenez, gutxienez hiru hilabetez egongo da itxita tarte hura.

Buztinzuri kalean egiten diharduten etxebizitzak aurrera doaz, eta orain, urbanizazio lanak egiten hasi dira; horregatik, hain zuzen ere, itxi dute kalea.

Alde batetik, lurzoru berria jarriko dute kale hartan eta eskolatik Sagastirako bidean; bestalde, egunkariaren saltokiaren aurreko aldean parke bat eta Ondarrera igarotzeko oinezkoendako zubia egingo dituzte.

Azkenik, Txorikua etxea eraitsi egingo dute. Etxe hura botata, autoendako errepidea egingo dute, Sagasti eta Kalegoi lotzeko.



Zirkulazioan aldaketa ugari eragin ditu Buztinzuri kalea itxita egoteak.

Lan horiek guztiak amaitzen dituztenean, herri barruko zirkulazioa zeharo aldatuko dute. Ibarrondoko bidegurutzetik plazarainoko bidea noranzko baka-

rrekoa izango da, eta bi lotune izango ditu Sagasti kalearekin: eskola ondoan bata eta Ibarrondoko bidegurutze parean bestea, Txorikua etxea dagoen tokian.

LURZORU MOTAK IKUSGAI DAUDE

Udalak oraindik ez du erabaki datozen hilabeteotan Buztinzurin zelako lurzorua jarriko duen. Izan ere, erabakia hartu aurretik,

herriarren iritzia jakin nahi du; horregatik, aukeran dauden lurzoru motak ikusgai jarri ditu oraingo astean udaletxeko osoko bilkuren aretoan. Bulegoko ordutegian egongo da zabalik erakusketak, datozen bi asteotan. Udalaren asmoa da erabakia irailean bertan hartzea.

Irisgarritasun arauetara jarraituz, egingo duten lurzoru berriak ez da oztopo arkitektonikorik egongo: errepidea eta espaloi maila berean egongo dira.

Lehendabiziko fasean, Buztinzurin, itxita dagoen zatian, eta eskola ondotik Sagastira doan bidean jarriko dute lurzoru berria; bigarren fasean, berriz, plazatik eskolarainoko zatian. Udalaren asmoa da herriko alde zahar osoan berritzea lurzorua.

BEASAIN-DURANGO PROIEKTUA

Lurzoru motekin batera, beste erakusketak ere jarri dute udaletxean: Beasain-Durango autobidariarena, hain zuzen ere. Bergararik Zumarragarainoko tartearen proiektua eta maketak jarri dituzte ikusgai. Kontuan hartu behar da, gainera, irailean bukatzen dela proiektu horri alegazioak aurkezteko epea.



Istripu larria saihesbidean

Aurreko asteko zapatu arratsaldean istripu larria gertatu zen Antzuolako saihesbidean, Estalarako zubiaren azpian, hain zuzen ere. Arratsaldeko 17:30 aldera gertatu zen istripua, eta hiru autok jo zuten elkar. Bi lagun hil ziren istripuan, 12 eta 17 urteko bi gazte, hain zuzen, eta beste zazpi lagun zauritu ziren, horietako bi larri. Guztiak kanpokoak ziren.

Istripuaren ondorioz, ertzainek itxi egin zuten errepidea, eta auto ilarak sortu ziren. /A.I.

LABUR

Udalbatzak atzera bota zuen Gertu Gaeren mozioa

Gertu Gae plataformak aurkeztutako mozioa aztertu zuten uztailako osoko bilkuran. Zera eskatzen zioten udalbatzari: "Herriak emandako ordezkariak eta eskubideak onartzea eta hori gauzatzeko behar diren baldintzak eta baliabideak erabiltzea". Mozio hura atzera botatzea erabaki zuten, aho batez.

Bestalde, osoko bilkuren ordua aldatzea erabaki zuten: hemendik aurrera, 08:00etan egingo dituzte bilkurak, hileko azkeneko egubakoitzetan.

ELKARRIZKETA

OIHAN GEZALAGA/GRAFITI EGILEA

"Zaletasun honek arrisku puntu bat badauka, baina hori ere oso polita da"

Gailur tabernan grafitia egin duenetik, jende askok jakin du grafiti egilea dela Oihan. Orduetik hona, gainera, eskaintza ugari jaso ditu. 17 urte ditu Oihanek, eta Mekanika ikasketak egingo ditu oraingo ikasturtean.

Aita pintorea eta semea, herriz, grafiti egilea...

Hala da, bai, baina aita pintorea izateak ez du inolako eraginik izan. Margoak lortzeko erraztasunak badituzte, eta merkeago, gainera, baina gainera, aita ez du eraginik izan.

Gailurren grafitia egin duzunetik, herri osoak ikusi ahal izan du zure lana. Hori pozgarria izango da, ezta?

Bai, pozgarria da, eta gainera, lana ere ematen du; orduetik hona era horretako lanak egiteko eskaintza mordoa jaso dut. Eskaintza gehienak etxeetako logela eta egongeletan grafitiak egiteko izan dira, eta beste bat lokal bat margotzeko.

Lanak eskaintzeaz gain, jendeak zer komentatzen dizu?


Jendeari gustatzen zaizkio grafitiak, lan orijinala egiten dudala esaten didate.

Nondik sortu zaizu grafiti-eko zaletasuna?

Orain dela urte eta erdi inguru hasi nintzen. Grafitiak ikusten nituenean, asko gustatzen zitzaizkidan, baina iruditzen zitzaidan nik ezin izango nituela inoiz egin. Egun baten, baina, hastea erabaki nuen. Neure kontura hasi nintzen ikasten; aldizkarietatik ideiak hartu, lehenengo paperean marraztu... Politikopoliki hobetzen joaten da.

Zaletasun hau praktikan jartzea ez da batere erraza, ezta?

Arrisku puntu bat badauka, baina horrek badauka abantaila bat ere: arriskuak adrenalina igorazten du, eta hori oso polita da.



ARGAZKILARIA XXXXXXXXX

"Neure kontura hasi nintzen grafitiak egiten, aldizkarietatik ideiak hartuta"

Nik pare bat aldiz izan dut arazotxoren bat ertzainekin, baina garrantzi handi barikoa.

Zaletasun honen beste alde txar bat da pagaren zati handi bat materiala erosten gastatu behar dela, baina gustatuz gero, gastatu egin behar.

"Pagaren zati handi bat grafitiak egiteko materiala erosten gastatu behar izaten dut"

Antzuolan ezagutzen duzu grafitiak egiten dituen beste lagun bat?

Ez, uste dut Antzuolan bakarra naizela; neu bakarrik ibiltzen naiz hemen, baina Bergaran badituzte grafitiak egiten dituzten lagunak.

KIROLA

Bi futbol talde berri osatu dituzte herrian

AINTZANE IRIZAR

Bi futbol talde gehiago izango ditugu herrian denboraldi berrian; erregional eta gazte mailako taldeez gain, nesken taldea eta kadeteena osatu ditu AKEk.

Oraingo astean hasi dituzte entrenamendu saioak taldeok, eta iraileko hirugarren hastean ekingo diote denboraldiari. Erregional mailako taldeari dagokionez, entrenatzaile berriak izango ditu: Julen Iparragirre eta Mikel Larrañaga, hain zuzen ere.

Gazte mailako taldea, berriz, Andres Arbuluk eta Pablo Olal-

dek eta Gaizka Asensiok entrenatuko dute, iaz bezala.

Neskek Iratxe Azkargorta izango dute entrenatzaile. 12 eta 16 urte bitarteko neskek osatzen dute taldea, eta Futbol 8 deritzon txapelketan hartuko dute parte.

Kadete mailako taldea, azkenik, Mikel Larrañagak entrenatuko du.

FERNANDEZ, PRESIDENTE BERRIA

Uztailean egin zuen urteko batzarrak Antzuola Kirol Elkarteak. Besteak beste, presidente berria aukeratu zuten hantxe: Jose Angel Fernández, hain zuzen ere.



12 eta 16 urte bitarteko nesken futbol taldea osatu dute.

A.I.

LABUR

Finalista Eguna ospatuko du Arrola mendi elkarteak domekan, Trekutzen

Etzi, domeka, ospatuko dute Finalista Eguna. 09:00etan plazatik irtengo dira, eta ibilaldi bat egin ondoren, Trekutzera iritsiko dira. Hilaren 13an eta 14an, berriz, kanpaldia egingo dute Valderejon. Martitzen arratsaldean eman dezakezue izena Arrolaren egoitzan.

KZGunea zabaldu dute, eta hainbat ikastaro hasiko dituzte irailean bertan

Dagoeneko ohiko ordutegiari heldu dio irailean KZGuneak: astelehenetik egubakoitzera egongo da zabalik, 16:00etatik 20:00etara. Hil honetan, gainera, Interneten gaineko ikastaroak hasiko dituzte; izena emateko, 943 78 70 86 telefono zenbakira dei dezakezue.

LARREA**TABERNA**Kalebarren 17
ANTZUOLA

Tomas Gezalaga

**Zoruen kutxilatua
eta
barnizaketa**Kalegoi 21
Tf. eta faxa 943 76 64 07
Poltsikokoa 616 277 999
ANTZUOLA / BERGARA**ANTZUOLA**Apainketak eta
isolamenduak
Pladurrezko dibisioakKalegoi 21 ANTZUOLA
676 997 400
Biltegia: 943 78 70 40**GAILUR**taberna eta
gozotegiaBuztinzuri 13 ANTZUOLA
Tf. 943 78 70 32

Tomas Gezalaga

**Apainketarako eta
industriarako pinturak
•
Paper margotzak
•
Moketak eta tapizatuak**Kalegoi 21
Tf. eta faxa 943 76 64 07
Poltsikokoa 616 277 999
ANTZUOLA / BERGARA